

I. DISPOSICIÓN XERAIS

MINISTERIO DE AGRICULTURA E PESCA, ALIMENTACIÓN E MEDIO AMBIENTE

10221 *Real decreto 727/2017, do 21 de xullo, polo que se aproban os estatutos xerais dos colexios oficiais de enxeñeiros agrónomos e do seu Consello Xeral.*

Os estatutos xerais dos colexios oficiais de enxeñeiros agrónomos e do seu Consello Xeral foron aprobados polo Real decreto 2716/1982, do 24 de setembro. Polo Real decreto 1246/1998, do 19 de xuño, modificáronse os artigos cinco, doce e trece dos estatutos xerais, a fin de adecualos á Lei 7/1997, do 14 de abril, sobre medidas liberalizadoras en materia de solo e de colexios profesionais.

Por imperativo da Lei 2/1974, do 13 de febreiro, de colexios profesionais, e de acordo co disposto no seu artigo sexto, número dous, os consellos xerais deben elaborar para todos os colexios dunha mesma profesión, e oídos estes, uns estatutos xerais que se someterán á aprobación do Goberno a través do ministerio competente e na mesma forma elaboraranse e aprobaranse os estatutos nos colexios de ámbito nacional.

A prolongada vixencia dos actuais estatutos aconsellaba unha revisión en profundidade e posta ao día da totalidade dos seus preceptos, circunstancia que xa foi destacada polo Consello de Estado cando, con ocasión da modificación parcial operada polo Real decreto 1246/1998, do 19 de xuño, emitiu o seu preceptivo informe.

Por outra parte, o actual proceso de adaptación do ordenamento xurídico español aos cambios introducidos pola Directiva 2006/123/CE do Parlamento Europeo e do Consello, do 12 decembro de 2006, relativa aos servizos no mercado interior, e polas súas normas de transposición fai necesario modificar os estatutos xerais.

Así, co obxectivo de actualizar os estatutos e de adaptalos ás modificacións incorporadas na Lei 2/1974, do 13 de febreiro, sobre colexios profesionais, pola Lei 25/2009, do 22 de decembro, de modificación de diversas leis para a súa adaptación á Lei sobre o libre acceso ás actividades de servizos e o seu exercicio, apróbanse os novos estatutos xerais dos colexios oficiais de enxeñeiros agrónomos e do seu Consello Xeral.

Neles mantense expresamente a obrigaición de colexiación para o exercicio da profesión, de acordo co establecido na disposición transitoria cuarta da Lei 25/2009, dada a importancia que esta cuestión presenta e a fin de evitar equívocos. E prevese que, cando se aprobe a lei estatal a que se refire a dita disposición transitoria, a obrigaición de colexiación serao na medida en que esa lei estatal a recolla e nos termos que nela se establezan.

O Consello Xeral de Colexios Oficiais de Enxeñeiros Agrónomos, oídos os colexios profesionais da súa especialidade, elevou a proposta de novos estatutos á consideración do Ministerio de Medio Ambiente, e Medio Rural e Mariño conforme as previsións da citada Lei 2/1974, do 13 de febreiro.

De acordo co anterior, por proposta da ministra de Agricultura, Alimentación e Medio Ambiente, de acordo co Consello de Estado e logo de deliberación do Consello de Ministros na súa reunión do día 21 de xullo de 2017,

DISPOÑO:

Artigo único. *Aprobación dos estatutos xerais dos colexios oficiais de enxeñeiros agrónomos e do seu Consello Xeral.*

Apróbase o texto dos estatutos xerais dos colexios oficiais de enxeñeiros agrónomos e do seu Consello Xeral nos termos que figuran a seguir.

Disposición transitoria única. *Aprobación ou adaptación dos estatutos particulares.*

1. No prazo máximo dun ano desde a entrada en vigor do presente real decreto, os colexios oficiais de enxeñeiros agrónomos aprobarán ou adaptarán, se for o caso, os seus estatutos particulares a estes estatutos xerais e presentaranos á Administración pública competente.

2. Durante o citado período permanecerán en vigor os estatutos vixentes en todo o que non se opoñan aos aprobados polo presente real decreto.

Disposición derogatoria única. *Derrogación do Real decreto 2716/1982, do 24 de setembro.*

Queda derogado o Real decreto 2716/1982, do 24 de setembro, polo que se aproban os estatutos xerais dos colexios oficiais de enxeñeiros agrónomos e do seu Consello Xeral.

Disposición derradeira primeira. *Título competencial.*

O presente real decreto dítase ao abeiro do disposto no artigo 149.1.18.^a da Constitución, que atribúe ao Estado a competencia exclusiva en materia de bases do réxime xurídico das administracións públicas.

Disposición derradeira segunda. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 21 de xullo de 2017.

FELIPE R.

A ministra de Agricultura e Pesca,
Alimentación e Medio Ambiente,
ISABEL GARCÍA TEJERINA

ESTATUTOS XERAIS DOS COLEXIOS OFICIAIS DE ENXEÑEIROS AGRÓNOMOS E DO SEU CONSELLO XERAL

TÍTULO I

Disposicións xerais

CAPÍTULO I

Definicións xerais

Artigo 1. *Definición e obxecto.*

Os presentes estatutos xerais regulan a organización integrada polos colexios oficiais de enxeñeiros agrónomos e polo seu Consello Xeral. A organización colexial actuará ao servizo do interese xeral da sociedade e dos seus colexiados mediante o exercicio das funcións e competencias que lle son propias.

Artigo 2. *Natureza dos colexios.*

1. Os colexios oficiais de enxeñeiros agrónomos son corporacións de dereito público constituídas e recoñecidas polo artigo 36 da Constitución e reguladas pola Lei 2/1974, do 13 de febreiro, de colexios profesionais, e integradas polos profesionais que exercen a profesión de enxeñeiro agrónomo.

2. Os colexios oficiais de enxeñeiros agrónomos teñen personalidade xurídica propia, sen ánimo de lucro e plena capacidade de obrar para o cumprimento dos seus fins. Na súa organización e funcionamento gozan de plena autonomía no marco dos presentes estatutos.

Artigo 3. *Fins esenciais.*

Son fins esenciais dos colexios oficiais de enxeñeiros agrónomos, sen prexuízo das competencias que as administracións públicas teñan por razón da relación funcional, así como a liberdade a título individual dos colexiados para a afiliación en organizacións sindicais ou empresariais:

- a) A ordenación do exercicio da profesión de enxeñeiro agrónomo cando estea suxeita a colexiación obrigatoria.
- b) A defensa dos dereitos e intereses profesionais dos seus colexiados.
- c) A protección dos intereses dos consumidores e usuarios dos servizos profesionais dos seus colexiados.
- d) A representación institucional exclusiva da profesión de enxeñeiro agrónomo cando estea suxeita a colexiación obrigatoria.
- e) A colaboración coas administracións e institucións públicas nacionais e internacionais.

Artigo 4. *Ámbito territorial e organización dos colexios.*

1. O ámbito territorial de cada colexio oficial de enxeñeiros agrónomos será o que determine a súa norma de creación, con suxeición, se for o caso, ao previsto na lexislación estatal ou autonómica de aplicación. O colexio estenderá a súa competencia profesional e disciplinaria a todo o seu ámbito territorial.

2. Corresponde a cada colexio establecer e regular autonomamente a súa organización e normas de funcionamento propias, así como o procedemento de elección dos seus órganos de goberno, con suxeición á seguinte organización básica:

- a) Órganos xerais: a asemblea xeral, a xunta xeral de colexiados ou órgano equivalente, a xunta de goberno e o decano.
- b) Órganos territoriais ou sectoriais: os que, se for o caso, establezan os estatutos particulares.

Artigo 5. Consello Xeral.

1. Todos os colexios oficiais de enxeñeiros agrónomos se integran no Consello Xeral de Colexios Oficiais de Enxeñeiros Agrónomos.

2. O Consello Xeral de Colexios Oficiais de Enxeñeiros Agrónomos é unha corporación de dereito público con personalidade xurídica propia, sen ánimo de lucro e plena capacidade para o cumprimento dos seus fins, que se rexe polo disposto na Lei 2/1974, do 13 de febreiro, e nos presentes estatutos.

3. Os fins esenciais do Consello Xeral consisten en ordenar o exercicio profesional, representar e defender unitariamente a profesión, os seus colexios e os intereses profesionais dos seus colexiados en canto teñan ámbito ou repercusión nacional, así como a colaboración coas administracións e institucións públicas nacionais e internacionais.

4. O Consello Xeral de Colexios de Enxeñeiros Agrónomos estende a súa actuación a todo o territorio nacional. O seu domicilio, coa totalidade dos seus servizos, radicará en Madrid, sen prexuízo de poder celebrar reunións en calquera outro lugar do territorio español cando así o aprobe a maioría dos membros do órgano do dito consello que vaia celebrar a citada reunión.

Artigo 6. Sistema normativo.

1. Os colexios oficiais de enxeñeiros agrónomos réxense polas seguintes normas:

- a) A lexislación estatal e autonómica en materia de colexios profesionais.
- b) Os presentes estatutos xerais.
- c) Os seus estatutos, regulamentos de réxime interior, normas deontolóxicas e demais disposicións ou acordos de alcance xeral que se adopten para o desenvolvemento e a aplicación das anteriores.
- d) O resto do ordenamento xurídico en canto resulte aplicable.

2. En materia de procedemento rexerá supletoriamente a lexislación vixente sobre réxime xurídico das administracións públicas e do procedemento administrativo común.

3. Os acordos, decisións ou recomendacións do colexio deberán observar os límites da Lei 15/2007, do 3 de xullo, de defensa da competencia.

4. As comunicacións comerciais dos profesionais colexiados axustaranse ao disposto na Lei 34/1988, do 11 de novembro, xeral de publicidade.

Artigo 7. Relación coa Administración.

O Consello Xeral e, se for o caso, os colexios oficiais de enxeñeiros agrónomos, relacionaranse coa Administración xeral do Estado e co resto das administracións públicas a través do ministerio, consellería ou departamento que teña atribuídas as competencias en materia de agricultura en cada momento.

CAPÍTULO II**Funcións e competencias dos colexios****Artigo 8. Funcións do colexio.**

Para a consecución dos fins esenciais sinalados no artigo 3 destes estatutos, os colexios oficiais de enxeñeiros agrónomos desempeñan, ao abeiro da lexislación sobre colexios profesionais, funcións de ordenación do exercicio profesional, de representación e defensa da profesión e dos seus membros, de servizo aos colexiados e de autoorganización. Do mesmo modo, o colexio velará polos intereses dos consumidores e usuarios.

Artigo 9. *De ordenación do exercicio profesional.*

Son funcións de ordenación do exercicio profesional as seguintes:

- a) Levar o rexistro de todos os seus membros, que estará permanentemente actualizado e no cal constarán, ao menos, os seguintes datos: nomes e apelidos dos profesionais colexiados, número de colexiación, títulos oficiais que posúan, data de alta, domicilio profesional e situación de habilitación profesional. O colexio ofrecerá aos consumidores e usuarios acceso gratuíto ao rexistro de colexiados a través do seu portelo único.
- b) O rexistro das sociedades profesionais con domicilio social no ámbito territorial do colexio, conforme o disposto na Lei 2/2007, do 15 de marzo, de sociedades profesionais.
- c) Velar pola observancia da deontoloxía profesional e polo respecto debido aos dereitos dos usuarios dos seus servizos profesionais.
- d) O exercicio, na orde profesional e colexial, da potestade disciplinaria en caso de incumprimento das prescricións legais ou deontolóxicas.
- e) A vixilancia do cumprimento das normas que regulan o exercicio profesional, as normas estatutarias e corporativas e demais resolucións dos órganos colexiais.
- f) Adoptar as medidas conducentes a evitar a intrusión profesional.
- g) Adoptar as medidas conducentes a evitar os actos de competencia desleal que se produzan entre os colexiados, nos termos expresados no artigo 29.3.c destes estatutos.
- h) A intervención en vía de conciliación ou arbitraje, a petición das partes, en cuestións que por motivos profesionais se susciten entre colexiados.
- i) Atender as solicitudes de información sobre os seus colexiados, así como sobre as sancións firmes que lles tiver imposto e as peticións de comprobación, inspección ou investigación sobre aqueles que lles formulen as autoridades competentes dun Estado membro da Unión Europea, nos termos previstos na Lei 17/2009, do 23 de novembro, sobre o libre acceso ás actividades de servizos e o seu exercicio, en particular, no que se refire a que as solicitudes de información e de realización de controis, inspeccións e investigacións estean debidamente motivadas e que a información obtida se empregue unicamente para a finalidade para que se solicitou.
- j) Adoptar as medidas necesarias para que nos rexistros de colexiados consten datos suficientes dos prestadores de servizos dos Estados membros, para efectos de que os destinatarios teñan garantías para a resolución de litixios de conformidade co artigo 27.1 da Directiva 2006/123/CE do Parlamento e do Consello, do 12 de decembro de 2006.

Artigo 10. *De representación e defensa da profesión e dos seus colexiados.*

O colexio exercerá as seguintes funcións de representación e defensa da profesión e dos seus colexiados:

- a) Desempeñar no seu ámbito, a representación e defensa da profesión ante a Administración, institucións, tribunais, entidades e particulares, con lexitimación para ser parte en cantos litixios afecten os intereses profesionais e exercer o dereito de petición, nos termos previstos na Lei 2/1974, do 13 de febreiro, sobre colexios profesionais.
- b) Informar nos procedementos, administrativos ou xudiciais en que se discuta calquera cuestión profesional, cando sexan requiridos para isto ou cando se prevea a súa intervención conforme a lexislación vixente, así como, con carácter xeral, emitir informes ou ditames no ámbito da súa competencia.
- c) Informar, conforme as normas reguladoras, sobre os proxectos de disposicións normativas que regulen ou afecten directamente as condicións xerais das funcións profesionais da profesión de enxeñeiro agrónomo.

d) Cooperar na mellora do ensino e investigación da profesión, para o cal poderá crear institucións científicas, educativas ou culturais, ou colaborar con elas.

e) Participar, cando sexa requirido para isto, na elaboración dos plans de estudo, informar sobre as normas de organización dos centros docentes correspondentes á profesión e manter permanente contacto con estes, nos termos que determinen as disposicións reguladoras de tales materias, e preparar a información necesaria para facilitar o acceso á vida profesional dos egresados.

f) Participar nos consellos, órganos consultivos, comisións e órganos análogos das administracións públicas e das organizacións, nacionais ou internacionais, cando sexa requirido para isto.

g) Establecer e manter relacións e intercambios con organismos de carácter técnico, científico ou profesional, nacionais ou estranxeiros, dedicados a actividades que teñan afinidade cos fins e as funcións do colexio.

h) Exercer cantas funcións lle sexan encomendadas polas administracións públicas, de conformidade coa lexislación sobre procedemento administrativo, e colaborar con elas mediante a realización de estudos, a emisión de informes, a elaboración de estatísticas e outras actividades relacionadas cos seus fins que lle poden ser solicitadas ou acorde formular por iniciativa propia.

i) Desenvolver outras funcións que redunden en beneficio dos intereses profesionais dos colexiados.

j) Atender as queixas ou reclamacións presentadas polos seus colexiados.

k) Realizar aquelas actuacións que considere oportunas ou lle encomenden os poderes públicos conforme a lei.

Artigo 11. *De servizo.*

1. Os colexios poderán ofrecer, entre outros, os servizos seguintes:

a) A resolución mediante laudo, conforme a lexislación vixente sobre mediación e arbitraje, dos conflitos e discrepancias que sexan sometidos a eles. Esta arbitraje será de equidade.

b) A organización de actividades e servizos de interese para os colexiados de índole profesional, formativa, cultural, médico-profesional, asistencial, de previsión e outros análogos, ou colaborar, se for o caso, con institucións deste carácter.

c) O asesoramento e a organización de cursos de formación e especialización, procurando o perfeccionamento da actividade profesional dos seus colexiados e da súa formación continuada.

d) A colaboración e participación na creación dun sistema de cobertura de responsabilidades civís contraídas polos profesionais no desempeño da súa actividade, de libre subscripción por parte dos colexiados, e sometido á Lei 15/2007, do 3 de xullo, de defensa da competencia.

e) A elaboración e posta ao dispor dos colexiados dun modelo de nota de encarga, que os profesionais poderán presentar aos seus clientes e que conterá, ao menos, a determinación suficiente do obxecto da prestación e o seu custo previsto ou previsible, en razón da actividade que se vai realizar ou o método para a súa determinación, respectando a Lei 15/2007, do 3 de xullo. Os colexiados non comunicarán ao colexio, para o seu control ou visado, a nota de encarga do traballo profesional, salvo requirimento xustificado no curso dun procedemento disciplinario. Os colexios non poderán fixar baremos orientativos nin calquera outra orientación, recomendación, directriz, norma ou regra sobre honorarios profesionais.

f) O cobramento dos honorarios profesionais a través do colexio, para o caso de que o colexiado así o solicite, nas condicións que se determinen nos seus estatutos particulares.

2. Os colexios, ademais, deberán:
- Dispor dun portelo único nos termos previstos no artigo 10 da Lei 2/1974, do 13 de febreiro, e na Lei 19/2013, do 9 de decembro, de transparencia, acceso á información pública e bo goberno.
O portelo único establecerase como un punto de acceso electrónico único na páxina web, gratuito e a distancia. Este punto permitirá os procedementos e a obtención da información previstos no artigo 10.1 da Lei 2/1974, do 13 de febreiro.
Ademais, e para a mellor defensa dos consumidores e usuarios, o colexio ofrecerá a través do mencionado portelo único, de maneira clara, inequívoca e gratuíta, a información prevista no artigo 10.2 da Lei 2/1974, do 13 de febreiro.
 - Dispor dun servizo de atención aos colexiados e aos consumidores ou usuarios, segundo o disposto no artigo 12 da Lei 2/1974, do 13 de febreiro. Este servizo será accesible a través da páxina web dos colexios oficiais de enxeñeiros agrónomos e da do seu Consello Xeral (www.ingenierosagronomos.org ou www.cgcoia.org), onde existe un formulario, e será resolto no colexio oficial correspondente, comisión encargada ou órgano competente da organización colexial, conforme o procedemento que establezan os seus estatutos particulares.
 - Elaborar e facer pública unha memoria anual, conforme o establecido no artigo 11 da Lei 2/1974, do 13 de febreiro.
 - Colaborar coas autoridades competentes dos Estados membros da Unión Europea para o cumprimento do principio de asistencia recíproca establecido no artigo 5. u) da Lei 2/1974, do 13 de febreiro.
 - Visar os traballos profesionais dos colexiados, nos termos e supostos previstos nos artigos 5.q) e 13 da Lei 2/1974, do 13 de febreiro, e no Real decreto 1000/2010, do 5 de agosto, sobre visado colexial obrigatorio, ou a petición expresa do cliente.
 - Facilitar aos órganos xurisdiccionais e ás administracións públicas, de conformidade coas leis, a relación de colexiados que poidan ser requiridos para intervir como peritos ou designalos directamente.
 - Dispor a publicación obrigatoria da documentación que se relaciona no artigo 22.1. b), de maneira que sexa accesible tanto aos colexiados como aos consumidores e usuarios en xeral, sen necesidade de identificación.
 - Velar pola protección dos intereses dos consumidores e usuarios dos servizos profesionais.
3. O colexio deberá adoptar as medidas necesarias para o cumprimento do previsto neste artigo e incorporar para isto as tecnoloxías precisas que garantan a interoperabilidade entre os distintos sistemas e a accesibilidade das persoas con discapacidade.

Artigo 12. *De autoorganización.*

Os colexios, no exercicio da súa potestade de autoorganización interna, exercerán as seguintes funcións:

- Elaborar os seus estatutos particulares para a aprobación do Consello Xeral.
- Aprobar o regulamento de réxime interior en desenvolvemento e aplicación dos seus estatutos.
- Aprobar e executar os seus orzamentos.

TÍTULO II

Os colexios oficiais de enxeñeiros agrónomos

CAPÍTULO I

Dos colexiados

Sección 1.^a Réxime de colexiación

Artigo 13. *Clases de colexiados.*

1. Os colexiados poden ser de tres clases: de honra, de número e sociedades profesionais.
2. Os colexios poderán nomear colexiados de honra as persoas, naturais ou xurídicas, españolas ou estranxeiras, que acrediten méritos ou servizos sobranceiros prestados á profesión. A distinción poderá, se for o caso, concederse a título póstumo.
3. Os colexiados de número poden ser de colexiación obrigatoria ou de colexiación voluntaria. Estes últimos son aqueles que se encontran nalgunha das situacións previstas no artigo 17.2 destes estatutos.
4. O exercicio da profesión en forma societaria rexeráse polos artigos 15 e 16 destes estatutos.

Artigo 14. *Obrigatoriedade de colexiación.*

1. Será requisito indispensable para o exercicio da profesión de enxeñeiro agrónomo acharse incorporado a un colexio oficial de enxeñeiros agrónomos, cando unha lei estatal así o estableza, de acordo co artigo 3 da Lei 2/1974, do 13 de febreiro.
Do mesmo modo e en iguais termos, será requisito indispensable para o exercicio da profesión en forma societaria acharse incorporado a un colexio oficial de enxeñeiros agrónomos. O seu exercicio profesional rexeráse pola Lei 2/2007, do 15 de marzo, e polos artigos 15 e 16 destes estatutos.
2. Poderán igualmente incorporarse ou permanecer nos colexios, con carácter voluntario, os enxeñeiros agrónomos que non exerzan a profesión ou os que, por razón da súa modalidade de exercicio, se encontren legalmente dispensados do deber de colexiación, se for o caso, cando cumplan os requisitos do artigo 17.
3. A incorporación ao correspondente colexio de enxeñeiros agrónomos faculta para o exercicio da profesión en todo o territorio nacional. Nos supostos de exercicio profesional en territorio distinto ao de colexiación, para os efectos de exercer as competencias de ordenación e potestade disciplinaria que corresponden ao colexio do territorio en que se exerza a actividade profesional, en beneficio dos consumidores e usuarios, os colexios deberán utilizar os oportunos mecanismos de comunicación e os sistemas de cooperación administrativa entre autoridades competentes previstos na Lei 17/2009, do 23 de novembro, sobre o libre acceso e exercicio das actividades de servizos. No marco deste sistema de cooperación, os colexios non poderán exixir aos profesionais que exerzan nun territorio diferente ao de colexiación comunicación nin habilitación ningunha, nin o pagamento de contraprestacións económicas distintas daquelas que exixan habitualmente aos seus colexiados pola prestación dos servizos de que sexan beneficiarios e que non se encontren cubertos pola cota colexial.
4. No caso de desprazamento temporal para exercer a profesión noutro Estado membro da Unión Europea ou dun nacional noutro Estado membro que se despraza a España, observarase o disposto na normativa vixente en aplicación do dereito comunitario relativa ao recoñecemento de cualificacións profesionais.

Artigo 15. *Exercicio profesional baixo forma societaria.*

1. Os enxeñeiros agrónomos poderán exercer a súa profesión conxuntamente con outros colexiados baixo calquera forma lícita recoñecida en dereito. Tamén poderán exercer conxuntamente a súa profesión con profesionais doutras disciplinas, sempre que non o prohiba a lei. Cando a actividade profesional se desenvolva baixo forma societaria nos termos previstos na Lei 2/2007, do 15 de marzo, quedará suxeita a esta e será necesaria escritura pública de constitución e inscrición no Rexistro Mercantil ou, se for o caso, no correspondente rexistro de sociedades cooperativas, para a adquisición de personalidade xurídica.

2. As sociedades profesionais inscribíranse, cando así o estableza unha lei estatal, no rexistro de sociedades profesionais dun colexio oficial de enxeñeiros agrónomos.

Nos supostos de exercicio profesional en territorio distinto ao de colexiación, para os efectos de exercer as competencias de ordenación e potestade disciplinaria que corresponden ao colexio do territorio en que se exerza a actividade profesional, en beneficio dos consumidores e usuarios, os colexios deberán utilizar os oportunos mecanismos de comunicación e os sistemas de cooperación administrativa entre autoridades competentes previstos na Lei 17/2009, do 23 de novembro. No marco deste sistema de cooperación, os colexios non poderán exixir aos profesionais que exerzan baixo forma societaria nun territorio diferente ao de colexiación comunicación nin habilitación ningunha, nin o pagamento de contraprestacións económicas distintas daquelas que exixan habitualmente aos seus colexiados pola prestación dos servizos de que sexan beneficiarios e que non se encontren cubertos pola cota colexial.

3. Os colexios comunicarán ao Consello Xeral todas as inscricións practicadas para os efectos da súa anotación no Rexistro Central de Sociedades Profesionais. O Consello Xeral, no marco das obrigacións de asistencia recíproca que recolle o artigo 5.u) da Lei 2/1974, do 13 de febreiro, e nos termos previstos nesta, facilitará ás autoridades competentes a información que estas lle demanden sobre as sociedades inscritas nel.

4. A incorporación da sociedade profesional ao colexio supón a inscrición no rexistro colexial correspondente e a súa suxeición ás competencias que a Lei 2/1974, do 13 de febreiro, e os presentes estatutos xerais atribúen aos colexios sobre os profesionais incorporados a eles.

5. Os rexistros colexiais de sociedades profesionais rexeranse polas previsións contidas na Lei 2/2007, do 15 de marzo, e nos presentes estatutos xerais e, en desenvolvemento destes, pola normativa común aprobada polo Consello Xeral.

6. En ningún caso o exercicio mediante sociedades profesionais poderá implicar imposición de cargas ou tratamento discriminatorio en relación co exercicio individual.

Artigo 16. *Sociedades profesionais.*

1. A sociedade profesional inscrita no Rexistro de Sociedades Profesionais será titular dos dereitos e deberes que recoñece o capítulo I do título II destes estatutos xerais, con excepción dos dereitos electorais e de participación en órganos colexiais, que se reservan exclusivamente aos colexiados persoas físicas, incluídos os colexiados pertencentes a sociedades profesionais.

2. Así mesmo, a sociedade profesional inscrita poderá utilizar os servizos colexiais nas mesmas condicións que os enxeñeiros agrónomos colexiados.

Artigo 17. *Adquisición da condición de colexiado e solicitude de ingreso.*

1. Son condicións necesarias para ingresar nun colexio oficial de enxeñeiros agrónomos:

a) Posuír a titulación prevista no seguinte número e que resulte exixible de acordo coa normativa e demais requisitos legalmente requiridos para o exercicio en España da profesión de enxeñeiro agrónomo.

b) Non acharse incapacitado ou inhabilitado legalmente para o exercicio da profesión de enxeñeiro agrónomo.

c) Aboar, se for o caso, ao colexio de incorporación a correspondente cota de inscrición ou colexiación, que non poderá superar os custos asociados á tramitación da inscrición nin ser estes abusivos ou discriminatorios.

2. Teñen dereito a incorporarse a un colexio oficial de enxeñeiros agrónomos os que, cumprindo as condicións sinaladas no número anterior, estean en posesión dos títulos que, de acordo coa normativa vixente, habiliten para o exercicio da profesión de enxeñeiro agrónomo.

3. Os colexios, en execución do artigo 3.2 da Lei 2/1974, do 13 de febreiro, adoptarán as medidas necesarias para garantir a realización por vía electrónica dos trámites necesarios para a súa incorporación no correspondente rexistro.

4. O acceso e exercicio da profesión de enxeñeiro agrónomo rexeráse polo principio de igualdade de trato e non discriminación, en particular por razón de sexo, nacemento, orixe racial ou étnica, relixión ou conviccións, discapacidade, idade ou orientación sexual, e a denegación de colexiación poderá ser impugnada ante a xurisdición contencioso-administrativa.

5. De acordo co que sinalen os estatutos particulares, para ser admitido nun colexio, xuntarase á solicitude en documento normalizado o correspondente título orixinal ou testemuño notarial deste e certificación académica. O xustificante da universidade de procedencia do aboamento dos dereitos de expedición do título poderá suplir a ausencia do orixinal. Xuntarase, igualmente, unha declaración responsable de non estar incurso en causa ningunha que o inhabilite para o exercicio profesional. Se o solicitante é estranxeiro, a colexiación entenderase sen prexuízo da necesidade de cumprir os requisitos exixidos pola normativa sobre estranxeiría e inmigración para o establecemento e traballo dos estranxeiros en España.

6. De acordo co que sinalen os estatutos particulares, a solicitude de colexiación denegarase, ao menos, nos seguintes casos:

a) Cando os documentos presentados coa solicitude de ingreso sexan insuficientes ou ofrezan dúbidas sobre a súa lexitimidade e non se complementasen nin emendasen no prazo sinalado para o efecto.

b) Cando sufrise algunha condena por sentenza firme dos tribunais que no momento da solicitude o inhabilite para o exercicio profesional.

c) Cando fose expulsado doutro colexio sen ter sido rehabilitado.

d) Cando ao formular a solicitude se achar suspenso no exercicio da profesión, en virtude de sanción disciplinaria corporativa firme.

7. O órgano que designe cada estatuto particular resolverá as solicitudes de incorporación ao respectivo colexio no prazo máximo dun mes. Pasado ese prazo sen contestación, entenderanse aprobadas, sen prexuízo dos recursos pertinentes.

Artigo 18. *Perda da condición de colexiado.*

1. Son causas da perda da condición de colexiado:

a) Colexiados persoas físicas:

1.^a A renuncia voluntaria do colexiado manifestada por escrito, salvo que o solicitante estea obrigado a pertencer ao colexio por razón do seu exercicio profesional, caso en que a Xunta de Goberno poderá denegar a solicitude. Contra a resolución que desestime a solicitude de baixa, caben os mesmos recursos que contra a resolución dunha solicitude de ingreso.

2.^a O incumprimento, debidamente comprobado, dos requisitos de incorporación ao colexio.

3.^a A expulsión en virtude de sanción disciplinaria, que se rexerá polo procedemento regulado no artigo 34 destes estatutos.

4.^a Condena penal firme que supoña a inhabilitación nos termos que determine a sentenza conforme o Código penal. Este feito non suporá a perda da condición de colexiado se o condenado for colexiado de colexiación voluntaria, incluído no artigo 17.2 por razón da súa modalidade de exercicio.

5.^a A morte ou declaración de falecemento do colexiado.

6.^a A falta de pagamento das cotas ordinarias e/ou extraordinarias correspondentes a un ano natural.

b) Colexiados sociedades profesionais:

1.^a Cando se procedese á súa disolución. Non obstante, será posible a nova inscrición da sociedade profesional cando se reactivase por ser legalmente posible.

2.^a O incumprimento, debidamente comprobado, dos requisitos de incorporación ao colexio.

3.^a A renuncia voluntaria do colexiado, manifestada por escrito, salvo que o solicitante estea obrigado a pertencer ao colexio por razón do seu exercicio profesional, caso en que a xunta de goberno poderá denegar a solicitude. Contra a resolución que desestime a solicitude de baixa caben os mesmos recursos que contra a resolución dunha solicitude de ingreso.

4.^a Se ao colexiado pertencente á sociedade lle fose imposta polo colexio unha sanción firme que leve unida a súa expulsión, e na sociedade non houber outro socio profesional que teña a condición de colexiado.

5.^a Condena penal firme que supoña a inhabilitación nos termos que determine a sentenza conforme o Código penal.

6.^a Se se elimina do obxecto social a actividade profesional propia dos colexiados, naquelas de carácter multidisciplinar.

7.^a Falta de pagamento das cotas ordinarias ou extraordinarias correspondentes a un ano natural.

A perda de tal condición suporá a baixa no rexistro de sociedades profesionais do colexio.

2. Os colexios establecerán nos seus estatutos o procedemento para a determinación da perda da condición de colexiado, que en todo caso deberá incorporar un trámite de audiencia ao interesado no suposto previsto nas alíneas a) e b) do número anterior e o recurso procedente contra a resolución.

3. Recupérase a condición de colexiado:

a) Cando se solicite a reincorporación, se a baixa foi por renuncia voluntaria.

b) Cando se posúan os requisitos para a colexiación, se os incumpría.

c) Cando se obteña a rehabilitación ou caducase a sanción de calquera clase que dese lugar á perda e se solicite a admisión e sexa aceptada pola xunta de goberno do colexio.

d) Cando se aboan as cotas pendentes, se foi por falta de pagamento.

4. Os colexiados que teñan dereito a baixa voluntaria obterana na primeira reunión do órgano competente do colexio que se celebre desde que o soliciten de forma adecuada e cesarán no pagamento da cota desde a data de presentación da solicitude.

5. Os servizos que presta o colexio poderanse suspender aos colexiados, logo de notificación, por falta de pagamento da cota periódica correspondente a un período de tres meses, consecutivos ou non, e mentres non satisfagan ou xustifiquen o aboamento das cotas pendentes.

Artigo 19. Rexistro Central de Colexiados.

No Consello Xeral de Colexios Oficiais de Enxeñeiros Agrónomos constituirase un Rexistro Central de Enxeñeiros Agrónomos Colexiados. Os colexios darán conta inmediata ao Consello Xeral, para a súa anotación no rexistro central, de cantas resolucións adopten sobre incorporación ou baixa, así como das alteracións que se produzan canto á domiciliación profesional dos colexiados.

O Consello Xeral, no marco das obrigacións de asistencia recíproca que recolle o artigo 5.u) da Lei 2/1974, do 13 de febreiro, e nos termos previstos nesta, facilitará ás autoridades competentes a información que estas lle demanden sobre os colexiados inscritos.

*Sección 2.^a Dereitos e deberes**Artigo 20. Principios xerais.*

1. A incorporación a un colexio oficial de enxeñeiros agrónomos confire os dereitos e deberes recollidos nos presentes estatutos e na lexislación aplicable. O colexio protexerá e defenderá os seus colexiados no exercicio lexítimo da profesión.

2. Todos os enxeñeiros agrónomos colexiados son iguais nos dereitos e deberes establecidos neste capítulo.

3. O réxime de dereitos e deberes é de aplicación aos colexiados de número e ás sociedades profesionais, a estas últimas coas excepcións determinadas no artigo 16.1.

Artigo 21. Dereitos dos colexiados.

Son dereitos dos enxeñeiros agrónomos colexiados:

a) A participación no goberno do colexio, a intervención e voto nas sesións da xunta xeral e a facultade de elixir e ser elixido para formar parte da xunta de goberno, nos termos sinalados neste estatuto.

b) O exercicio das atribucións profesionais que lle sexan propias de acordo coas normas legais.

c) A formulación de peticións e a presentación de queixas ante os órganos do colexio.

d) A presentación de recursos contra os acordos e resolucións dos órganos colexiais.

e) A información regular sobre a actividade corporativa e de interese profesional e o exame dos documentos contables que reflectan a actividade económica do colexio, nas condicións que se establezan.

f) A obtención de información e, se for o caso, a certificación dos documentos e actos colexiais que os afecten persoalmente.

g) A utilización dos servizos colexiais, na forma e condicións que se fixen.

h) O asesoramento e defensa do colexio, dentro do ámbito da súa competencia, nas cuestións que se susciten relativas aos seus dereitos e intereses de carácter profesional, na forma e condicións que se fixen.

i) O pleno aproveitamento dos dereitos colexiais en canto non se produza a baixa ou suspensión conforme estes estatutos.

j) Examinar arquivos, rexistros e contas do colexio conforme o procedemento que a súa normativa interna estableza.

k) Exercer cantos dereitos se conteñan nestes estatutos e demais disposicións en vigor.

Artigo 22. Deberes dos colexiados.

1. Os membros dun colexio oficial de enxeñeiros agrónomos están obrigados a:

a) Exercer a profesión con observancia da deontoloxía profesional e dos códigos de conduta da profesión aprobados e en protección dos intereses dos consumidores e usuarios dos seus servizos.

- b) Coñecer e cumprir, no desempeño da profesión, as disposicións estatutarias, as normas deontolóxicas e as resolucións ditadas polos órganos colexiais.
- c) Gardar o debido respecto aos titulares dos órganos colexiais.
- d) Observar as incompatibilidades profesionais establecidas con rango de lei.
- e) Manter un adecuado nivel de cualificación profesional a través da actualización dos seus coñecementos e capacidades.
- f) Contribuír puntualmente ao sostemento económico do colexio conforme o disposto nas normas estatutarias e nos acordos adoptados polos órganos colexiais para a súa aplicación.
- g) Actuar con fidelidade e dilixencia no desempeño dos cargos colexiais para os cales sexa elixido ou designado.
- h) A subscrición dun seguro de responsabilidade civil profesional ou outra garantía equivalente, cando así estiver exixido en norma con rango de lei.
- i) Gardar o segredo profesional, incluídas as informacións confidenciais que o colexio determine.

2. Estes deberes configuran o réxime necesario da actuación profesional e corporativa do colexiado. A súa observancia constitúe o obxecto propio das potestades colexiais de control e disciplina reguladas nestes estatutos e no código deontolóxico.

Sección 3.^a Competencias colexiais de control da actividade profesional

Artigo 23. Réxime xeral.

As competencias para o cumprimento das funcións colexiais relativas á actividade profesional dos enxeñeiros agrónomos son de natureza regrada e terán como único fin lexítimo velar polo cumprimento da normativa legal, estatutaria e deontolóxica da profesión, e defender a lexítima actuación do profesional sen menoscabo dos dereitos dos que contratan os seus servizos.

Artigo 24. Visado.

1. O colexio visará os proxectos e demais traballos profesionais nos termos e supostos previstos nos artigos 5.q) e 13 da Lei 2/1974, do 13 de febreiro, e no Real decreto 1000/2010, do 5 de agosto, ou por petición expresa do cliente.

2. O visado é un acto de control da actividade profesional no ámbito das competencias propias do colexio.

O visado colexial deberá expresar cal é o seu obxecto, que aspectos se someten a control e cal é a responsabilidade que asume o colexio, e comprenderá, como mínimo, a comprobación dos seguintes datos:

- a) A identidade e habilitación profesional do autor do traballo.
- b) A corrección e integridade formal da documentación do traballo profesional de acordo coa normativa aplicable.

3. O visado non comprenderá en ningún caso os honorarios nin as demais condicións contractuais, cuxa determinación se deixa ao libre acordo das partes, nin tampouco comprenderá o control técnico dos elementos facultativos do traballo profesional. Os dereitos económicos derivados do exercicio da función colexial do visado deberán ser razoables e nunca abusivos nin discriminatorios.

4. A responsabilidade colexial derivada do exercicio da función de visado colexial, así como o custo económico dos visados e a súa publicidade, rexeranse polo disposto no artigo 13 da Lei 2/1974, do 13 de febreiro, e no Real decreto 1000/2010, do 5 de agosto, sobre visado colexial obrigatorio.

5. Nos traballos profesionais que se sometan a visado colexial de acordo co disposto nos artigos 5. q) e 13 da Lei 2/1974, do 13 de febreiro, este poderá expedirse tamén a favor da sociedade profesional.

6. O regulamento de réxime interno do colexio detallará, se for o caso, o procedemento a que se debe suxeitar o exercicio da función de visado, que poderá tramitarse por vía telemática.

CAPÍTULO II

Réxime económico

Artigo 25. *Recursos económicos.*

1. Os colexios establecerán nos seus estatutos o réxime dos seus recursos económicos e financeiros, tendo en conta o sinalado nos artigos 51 e 52 destes estatutos xerais e na lexislación estatal e autonómica sobre colexios profesionais.

2. As xuntas de goberno dos colexios confeccionarán anualmente o proxecto de orzamentos de ingresos e gastos que someterán á aprobación da xunta xeral no último trimestre de cada ano. Así mesmo, no primeiro semestre de cada ano, a xunta xeral deberá coñecer e aprobar, se for o caso, o balance e liquidación orzamentaria, fechados en 31 de decembro do ano anterior.

CAPÍTULO III

Réxime disciplinario

Artigo 26. *Ámbito da función disciplinaria.*

Os colexios exercerán a potestade disciplinaria respecto das accións e omisións dos colexiados e, se for o caso, das sociedades profesionais, que constitúan infracción disciplinaria en virtude dos seus estatutos.

Os colexiados, incluídas as sociedades profesionais, que cometeren calquera das infraccións tipificadas no artigo 28 serán sancionados disciplinariamente con independencia de calquera outra responsabilidade civil, penal ou administrativa en que puideren incurrir.

Por virtude da súa incorporación ao colexio oficial, os colexiados quedan sometidos ao réxime disciplinario do colexio, segundo o teor do disposto nos estatutos e, se for o caso, no código deontolóxico vixentes no momento de comisión da infracción.

Artigo 27. *Competencia.*

1. O exercicio da potestade disciplinaria corresponderá en cada colexio oficial de enxeñeiros agrónomos ao órgano colexial que a teña atribuída de acordo cos seus estatutos.

2. Os colexios e o Consello Xeral, no marco das obrigacións de asistencia recíproca que demanda o artigo 5. u) da Lei 2/1974, do 13 de febreiro, atenderán as solicitudes de información e as peticións de inspección ou investigación que lles dirixan motivadamente as autoridades competentes.

Artigo 28. *Infraccións.*

1. As infraccións clasificaranse en leves, graves ou moi graves.
2. Son infraccións leves:

- a) A falta de consideración ou menosprezo aos colexiados.
- b) A desconsideración non ofensiva cara aos membros da xunta de goberno.
- c) O incumprimento dos deberes colexiais e profesionais regulados nos estatutos, no regulamento de réxime interior e nas normas deontolóxicas, sempre que non sexan infraccións graves ou moi graves.

3. Son infraccións graves:

a) O incumprimento dos deberes colexiais e profesionais regulados nos estatutos, no regulamento de réxime interior e nas normas deontolóxicas, cando disto resulte un prexuízo para o colexio, para outros colexiados ou para as persoas destinatarias do servizo.

b) A realización de traballos profesionais con omisión do visado colexial no suposto de que este sexa exixible de acordo co disposto nos artigos 5.q) e 13 da Lei 2/1974, do 13 de febreiro, ou a imposición de visar os traballos colexiais aos clientes cando non sexa legalmente exixible.

c) A realización de actos de competencia desleal no exercicio da profesión, cando fosen apreciados por órgano xudicial en sentenza firme.

d) O falseamento ou inexactitude grave da documentación profesional.

e) Os actos de desconsideración ofensiva cos compoñentes da Xunta de Goberno e cos demais colexiados.

f) A realización de actividades profesionais incompatibles por razón do cargo ou función desempeñada, ou en asociación ou colaboración cos que estean afectados pola situación de incompatibilidade, cando o coñecese.

g) A realización de actuacións profesionais que ocasione un prexuízo aos intereses dos consumidores e usuarios ou á profesión ou a comisión de delitos dolosos, en calquera grao de participación, cuxa execución se realice valéndose da súa condición profesional, logo de pronunciamento xudicial firme.

h) A falta de atención ou de dilixencia no desempeño dos cargos colexiais ou o incumprimento dos deberes correspondentes ao cargo.

i) O incumprimento ou desatención reiterada dos requirimentos dos órganos colexiais ou das sancións impostas por infraccións disciplinarias, unha vez que sexan exixibles.

j) A falta de subscrición dun seguro de responsabilidade civil ou outra garantía equivalente, cando isto veña exixido por lei.

k) A vulneración do segredo profesional, por culpa ou negligencia, con prexuízo para terceiros.

l) A vulneración da obriga de pór á disposición dos usuarios toda a información exixida no artigo 22.2 da Lei 17/2009, do 23 de novembro.

m) Ter sido sancionado en tres ocasións por infraccións leves no prazo de cinco anos.

n) Ocasionar danos que supoñan un prexuízo económico grave para o patrimonio do Consello Xeral ou dos colexios, dos seus órganos reitores ou dos colexiados, así como ocasionarlles danos que afecten gravemente a súa imaxe e bo nome.

ñ) A falta de comunicación ao Rexistro Mercantil, ao Rexistro de Sociedades Cooperativas ou ao colexio da constitución dunha sociedade profesional ou das modificacións posteriores de socios, administradores ou do contrato social.

o) O incumprimento das previsións legais en relación cos requisitos de capital, composición de órganos de administración, e representación das sociedades profesionais, sexa mediante acordos públicos sexa mediante acordos privados ou actuacións concertadas entre os socios.

4. Son infraccións moi graves:

a) O encubrimento da intrusión profesional ou a colaboración na realización de actividades propias da profesión por quen non reúna a debida aptitude legal para isto, cando tales condutas fosen previamente apreciadas por sentenza firme,

b) As actuacións profesionais constitutivas de delito apreciadas por sentenza xudicial firme, con independencia da responsabilidade penal ou civil que se lle puiden exixir.

c) A emisión de facturas ou minutas por conceptos inexistentes ou por actuacións profesionais non realizadas.

d) A práctica profesional baixo os efectos de drogas, alcohol ou calquera substancia que afecte gravemente a aptitude física ou psíquica requirida para o desempeño da súa misión.

e) A reiteración no incumprimento dos deberes colexiais e profesionais regulados nos estatutos, no regulamento de réxime interior e nas normas deontolóxicas, cando disto resulte un prexuízo para o colexio, para outros colexiados ou para as persoas destinatarias do servizo.

f) Ter sido sancionado pola comisión de, ao menos, dúas infraccións graves no prazo de dous anos.

Artigo 29. Sancións.

1. Poderán imporse as seguintes sancións disciplinarias para os colexiados persoas físicas:

- 1.^a Apercibimento por oficio.
- 2.^a Multa de até 300 €.
- 3.^a Suspensión no exercicio profesional por un prazo de até seis meses.
- 4.^a Multa desde 301 a 6.000 €.
- 5.^a Suspensión no exercicio profesional por un prazo entre seis meses e un día e un ano.
- 6.^a Multa desde 6.001 a 12.000 €.
- 7.^a Suspensión no exercicio profesional por un prazo entre un ano e un día e dous anos.
- 8.^a Expulsión do colexio.

2. Poderán imporse as seguintes sancións disciplinarias para os colexiados sociedades profesionais:

- 1.^a Apercibimento por oficio.
- 2.^a Multa de até 300 €.
- 3.^a Suspensión no exercicio profesional por un prazo de até seis meses, o que suporá simultaneamente a baixa da sociedade no Rexistro de Sociedades Profesionais polo mesmo período da súa duración.
- 4.^a Multa desde 301 a 6.000 €.
- 5.^a Suspensión no exercicio profesional por un prazo de entre seis meses e un día e un ano, o que suporá simultaneamente a baixa da sociedade no Rexistro de Sociedades Profesionais polo mesmo período da súa duración.
- 6.^a Multa desde 6.001 a 12.000 €.
- 7.^a Suspensión no exercicio profesional por un prazo entre un ano e un día e dous anos, o que suporá simultaneamente a baixa da sociedade no Rexistro de Sociedades Profesionais polo mesmo período da súa duración.
- 8.^a Perda da condición de colexiado e consecuente baixa definitiva do Rexistro de Sociedades Profesionais con prohibición do exercicio profesional, sen prexuízo da posibilidade de solicitar a readmisión nos termos previstos no artigo 18.3 c).

Artigo 30. Correspondencia entre infraccións e sancións.

1. Ás infraccións leves corresponderanlles as sancións 1.^a e 2.^a descritas no número primeiro e segundo, respectivamente, do artigo anterior, ás graves as sancións 3.^a, 4.^a, e 5.^a e ás moi graves, as sancións 6.^a, 7.^a e 8.^a

2. Na aplicación das sancións teranse en conta as seguintes circunstancias:

- a) Grao de culpa.
- b) Beneficio económico obtido polo infractor.
- c) Desobediencia reiterada de acordos ou requirimentos colexiais.
- d) Intensidade do dano ou prexuízo causado.
- e) Acharse no exercicio de cargo público ou colexial ao cometer a infracción, cando prevaleza esta condición.
- f) Incurrir en conflito de intereses.

g) Ter sido sancionado anteriormente por resolución colexial firme non cancelada, a causa dunha infracción grave.

3. Con carácter xeral, as sancións graduaranse en función das circunstancias que concorran en cada caso e axustaranse aos principios xerais da potestade sancionadora establecidos na lexislación de réxime xurídico do sector público.

Artigo 31. Eficacia e execución das sancións. Comunicación a autoridades competentes.

1. As sancións 3.^a a 8.^a implican accesoriamente a suspensión dos dereitos electorais polo mesmo período da súa duración, así como, se for o caso, o cesamento nos cargos colexiais que se exercesen.

2. De todas as sancións, excepto da 1.^a, así como da súa cancelación, deixarase constancia no expediente colexial do interesado e darase conta ao Consello Xeral.

3. O Consello Xeral, no marco das obrigacións de asistencia recíproca que impón o artigo 5.u) da Lei 2/1974, do 13 de febreiro, comunicará ás autoridades competentes dos Estados membros que o soliciten motivadamente as sancións firmes impostas polos colexios de enxeñeiros agrónomos aos seus colexiados.

4. As sancións impostas polo colexio en que se exerza a actividade profesional producirán efectos en todo o territorio nacional.

5. As sancións que se impuxeren ás sociedades profesionais consistentes na baixa temporal ou na exclusión definitiva do Rexistro de Sociedades Profesionais serán comunicadas ao Ministerio de Xustiza e ao Rexistro Mercantil, e ao Rexistro de Sociedades Cooperativas, se for o caso, en que a sociedade sancionada estiver inscrita.

Artigo 32. Extinción da responsabilidade disciplinaria.

1. A responsabilidade disciplinaria extinguirase polo cumprimento da sanción, o falecemento do infractor, a prescrición da infracción ou a prescrición da sanción.

2. As infraccións leves prescribirán ao ano, as graves aos dous anos e as moi graves aos tres anos.

3. As sancións impostas por infraccións leves prescribirán ao ano, as correspondentes a infraccións graves aos dous anos e as impostas por infraccións moi graves aos tres anos.

4. Os prazos de prescrición das infraccións comezarán a correr desde o día da comisión da infracción e os das sancións desde o día seguinte a aquel en que adquira firmeza en vía corporativa a resolución sancionadora.

5. A prescrición das infraccións interromperase por calquera actuación colexial, expresa e manifesta, dirixida a investigar a presunta infracción con coñecemento do interesado. A realización de calquera acto colexial expreso e manifesto de execución da sanción con coñecemento do interesado interromperá o prazo de prescrición. En todo caso, volverá correr o prazo se o expediente sancionador estiver paralizado durante máis dun mes por causa non imputable ao presunto responsable ou infractor.

6. As sancións cancelaranse de oficio ao ano se a infracción for leve, aos dous anos se for grave e aos tres anos se for moi grave. Os prazos anteriores contaránse a partir do cumprimento efectivo da sanción. A cancelación supón a anulación do antecedente sancionador para todos os efectos, incluíndo o da reincidencia. Se o colexio non tiver practicado a cancelación, o interesado poderá pedila e o colexio deberá proceder de inmediato. En todo caso, as sancións non canceladas de oficio, transcorridos os correspondentes prazos, carecerán de efectos.

Artigo 33. Procedemento disciplinario.

1. Non se poderán impor sancións disciplinarias senón en virtude de expediente instruído para o efecto, logo de audiencia do interesado.

O procedemento disciplinario iniciaráo de oficio o órgano titular da función disciplinaria, por propia iniciativa, a petición razoada do decano ou por denuncia asinada por un

colexiado ou un terceiro con interese lexítimo, na cal deberán indicarse as infraccións presuntamente cometidas. Cando medie denuncia de calquera outra persoa, disporase a apertura dun trámite de información previa e, practicado este, ordenarase o arquivamento das actuacións ou a incoación dun expediente disciplinario. O órgano titular da función disciplinaria será a xunta de goberno ou a xunta de decanos, segundo corresponda.

2. O acordo de iniciación do expediente disciplinario deberá recoller a identificación da persoa ou persoas presuntamente responsables, os feitos sucintamente expostos que motivan a incoación do expediente, a súa posible cualificación e as sancións que puideren corresponder, sen prexuízo do que resulte da instrución, así como a indicación do dereito a formular alegacións e á audiencia no procedemento e dos prazos para o seu exercicio. O acordo notificarase aos interesados.

3. O órgano titular da función disciplinaria designará un órgano instrutor, diferente daquel, que se encargará da instrución do expediente disciplinario. Após as oportunas dilixencias indagatorias, o instrutor propondrá o sobresemento do expediente se non encontrar indicios de ilícito disciplinario ou formulará prego de cargos, en caso contrario. A resolución que declare o sobresemento do expediente disciplinario será inmediatamente notificada aos interesados. O expedientado poderá recusar o instrutor no prazo de sete días.

4. No prego de cargos indicárase, con precisión, claridade e debidamente motivados, os actos profesionais ou colexiais que se presumen ilícitos, a cualificación do tipo de infracción en que incorre aquela conduta e a sanción que, se for o caso, poida corresponder.

5. Concederáse ao interesado un prazo de quince días hábiles para que conteste por escrito e formule o oportuno prego de descargos, presente documentos e informacións, propoña as probas que coide oportunas e concrete os medios que considere convenientes para a súa defensa. Poderanse utilizar todos os medios de proba admisibles en dereito. O instrutor practicará as que coide pertinentes entre as propostas ou as que el mesmo poida acordar. Das audiencias e probas practicadas deixarase constancia escrita no expediente.

6. O instrutor formulará unha proposta de resolución, que fixará con precisión os feitos imputados ao expedientado, indicará a infracción ou infraccións cometidas e as sancións que correspondan. Desta proposta darase traslado ao interesado, ao cal se concederá novo trámite de audiencia polo prazo de quince días hábiles para que poida alegar canto coide oportuno ou conveniente ao seu dereito.

7. Concluída a instrución do expediente disciplinario, o instrutor dará conta da súa actuación e remitirá a proposta de resolución, xunto con todos os documentos, testemuños, actuacións, actos, notificacións e demais dilixencias que se realizasen no procedemento, ao órgano titular da función disciplinaria para que esta acorde a resolución que coide conveniente. Na adopción da correspondente resolución deberá absterse calquera membro que, se for o caso, participase na fase instrutora.

O órgano encargado de resolver, antes de ditar resolución, poderá devolver ao instrutor o expediente, mediante acordo motivado, para a práctica das dilixencias que sexan imprescindibles para a adopción da resolución.

8. A resolución será motivada e decidirá todas as cuestións suscitadas e aquelas outras derivadas do procedemento. Non poderá versar sobre feitos distintos dos que serviron de base á proposta de resolución. Na notificación da resolución indicárase o recurso que proceda contra ela, o órgano competente para resolvelo e o prazo para interpo-lo.

9. O prazo máximo para resolver e notificar será de seis meses.

10. Os acordos sancionadores serán executivos cando poñan fin á vía corporativa. Non obstante, no caso de que a execución poida causar prexuízos de imposible ou difícil reparación, o órgano sancionador poderá acordar motivadamente e de oficio ou por instancia de parte a suspensión da execución do acto impugnado.

11. En todo o non regulado no presente artigo aplicaranse as leis 39/2015, do 1 de outubro, do procedemento administrativo común das administracións públicas, e 40/2015, do 1 de outubro, de réxime xurídico do sector público.

CAPÍTULO IV

Réxime de distincións

Artigo 34. *Réxime de premios e distincións.*

Os estatutos particulares de cada colexio establecerán un réxime de premios e distincións colexiais para aquelas persoas ou entidades, colexiados ou non, que prestasen servizos destacados ao colexio ou contribuísen notablemente a aumentar o prestixio da profesión ou ao desenvolvemento do sector agroalimentario, do medio rural ou dos sectores en que os enxeñeiros agrónomos exerzan a súa actividade.

CAPÍTULO V

Réxime xurídico

Artigo 35. *Réxime xurídico.*

O réxime xurídico dos órganos colexiais axustarase ás normas contidas nos estatutos dos respectivos colexios, que establecerán o réxime de convocatoria, sesións e adopción de acordos dos distintos órganos colexiais.

Artigo 36. *Execución de actos.*

Os acordos adoptados polos órganos colexiais en exercicio de potestades administrativas consideraranse executivos desde a súa adopción, sen máis requisito que a súa notificación ou publicación en forma cando proceda e salvo que dos seus propios termos resulten sometidos a prazo ou condición de eficacia. Desta regra soamente se exceptúan as resolucións en materia disciplinaria, que se axustarán ao disposto no artigo 34 destes estatutos.

Artigo 37. *Recursos corporativos.*

1. Os actos e disposicións dos colexios suxeitos ao dereito administrativo serán impugnables directamente ante a xurisdición contencioso-administrativa, de conformidade co disposto na Lei 29/1998, do 13 de xullo, reguladora da xurisdición contencioso-administrativa, unha vez esgotados os recursos corporativos.

2. Os acordos e resolucións dos órganos colexiais, excepto os adoptados pola asemblea xeral, xunta xeral de colexiados ou órgano equivalente, e a xunta de goberno, son impugnables enalzada ante a xunta de goberno.

3. As resolucións dos recursos corporativos e os acordos e resolucións da asemblea xeral, xunta xeral de colexiados ou órgano equivalente, e da xunta de goberno serán impugnables enalzada ante o Consello Xeral, ao non esgotar a vía corporativa. Os ditados por órganos do Consello Xeral que poñan fin á vía corporativa poderán ser impugnados potestativamente en reposición ante o mesmo órgano que os ditou ou ser impugnados directamente ante a xurisdición contencioso-administrativa.

4. A interposición e resolución dos recursos, así como os seus prazos, réxense polo disposto na lexislación sobre réxime xurídico das administracións públicas e do procedemento administrativo común.

CAPÍTULO VI

Disolución dos colexios

Artigo 38. *Procedemento de disolución e réxime de liquidación.*

Salvo que os estatutos particulares de cada colexio dispoñan outra cousa, o procedemento de disolución e réxime de liquidación será o seguinte:

1. A disolución dun colexio oficial de enxeñeiros agrónomos, salvo nos casos en que veña imposta directamente por lei, promoverase por acordo adoptado polo mesmo colexio na forma prevista nos seus estatutos e deberá ser aprobada polo Consello Xeral de Colexios Oficiais de Enxeñeiros Agrónomos e de conformidade coa norma xurídica prevista pola normativa autonómica correspondente.

2. O colexio oficial de enxeñeiros agrónomos obxecto de disolución perderá a súa personalidade xurídica e capacidade no momento en que se publique no boletín oficial da comunidade correspondente a norma que dispuxo aquela, salvo no caso de que a disolución se produza pola creación dun ou varios novos colexios profesionais, suposto en que tal disolución terá efectividade no momento en que a teña a citada creación.

3. En caso de disolución dalgún colexio oficial de enxeñeiros agrónomos, darase o destino previsto nos seus estatutos aos fondos e propiedades. O consello autonómico correspondente, se existir, ou o Consello Xeral, en última instancia, acordará o destino que se dará aos fondos e propiedades en caso de que este non fose previsto, e non poderá ser outro que a outra entidade da organización colexial da profesión de enxeñeiro agrónomo ou a entidades sen ánimo de lucro, tales como fundacións e asociacións, con finalidades similares ás do colexio ou relacionadas coa profesión de enxeñeiro agrónomo.

4. En caso de acordarse a disolución dun colexio oficial de enxeñeiros agrónomos, o Consello Xeral designará unha comisión liquidadora, composta por un número impar de membros, que actuará con plenos poderes. Os liquidadores terán as funcións seguintes:

- a) Velar pola integridade do patrimonio do colexio e levar as contas.
- b) Concluir as operacións pendentes e efectuar as novas operacións que sexan necesarias para a liquidación.
- c) Cobrar os créditos do colexio.
- d) Liquidar o patrimonio e pagar as débedas.
- e) Aplicar os bens sobrantes da liquidación ás finalidades establecidas.
- f) Solicitar a cancelación dos asentos no Rexistro de Colexios Profesionais.

O Consello Xeral de Colexios Oficiais de Enxeñeiros Agrónomos deberá aprobar os traballos realizados pola comisión liquidadora.

TÍTULO III

O Consello Xeral dos Colexios Oficiais de Enxeñeiros Agrónomos

CAPÍTULO I

Organización e funcionamento

Artigo 39. *Órganos do Consello Xeral.*

1. Son órganos superiores do Consello Xeral dos Colexios Oficiais de Enxeñeiros Agrónomos:

- a) O presidente.
- b) A Xunta Xeral de Representantes.
- c) A Xunta de Decanos.

2. Teñen a condición de órganos auxiliares do Consello Xeral:

- a) A Comisión Permanente.
- b) O secretario do Consello Xeral.

*Sección 1.ª Órganos superiores*Artigo 40. *Presidente.*

1. O presidente ten a representación legal do Consello Xeral e exerce as seguintes funcións:

- a) Asumir a representación da organización colexial.
- b) Convocar, presidir e ordenar as sesións da Xunta Xeral de Representantes, a Xunta de Decanos, a Comisión Permanente e demais órganos colexiados do Consello Xeral que se crearen.
- c) Velar pola execución e debido cumprimento dos acordos adoptados polos órganos do Consello Xeral.
- d) Dar conformidade mediante o seu visto e prace ás actas e certificacións expedidas polo secretario do Consello Xeral.
- e) Ordenar os pagamentos.
- f) Exercer a inspección superior de todos os servizos e dependencias do Consello Xeral.

2. O presidente será elixido polos decanos dos colexios entre candidatos que veñan propostos por un mínimo de tres colexios e que teñan a condición de decano. A perda desa condición non leva anexa a perda automática da presidencia.

3. A duración do mandato do presidente do Consello Xeral será de catro anos. O presidente pode ser reelixido indefinidamente.

4. A elección do presidente efectuarase mediante votación, que será pública e nominativa en primeira volta, e requirirá maioría absoluta do número legal de membros electores. De non alcanzarse aquela, procederase á súa elección mediante votación secreta en segunda ou sucesivas voltas, nas cales se eliminará o candidato con menor número de votos. Os empates que se produzan en calquera das voltas dirimiranse mediante votacións adicionais por maioría simple. O regulamento de réxime interior do Consello Xeral completará as previsións necesarias sobre o procedemento electoral.

5. A presidencia do Consello Xeral é incompatible con calquera cargo ou emprego colexial, salvo o de decano dun colexio, ou en organismos ou entidades directamente relacionados cos fins e competencias do Consello.

6. Nos casos de ausencia, enfermidade ou vacante do presidente, suplirao provisoriamente no exercicio das súas funcións o decano dun colexio que aquel designe ou, na súa falta, o decano de maior idade. O presidente poderá delegar a súa representación noutros membros da Xunta de Decanos con carácter temporal e para fins específicos.

Artigo 41. *Xunta Xeral de Representantes.*

1. A Xunta Xeral de Representantes é o órgano representativo das xuntas de goberno dos colexios. Estará composta polo presidente e o secretario do Consello Xeral, os decanos, secretarios e interventores dos colexios, os delegados provinciais e un número de vogais das xuntas de goberno de cada colexio, conforme a seguinte táboa:

	Vogais
Até 200 colexiados	2
Até 500 colexiados	3
Até 1.000 colexiados	4
Até 1.500 colexiados	5
Até 1.500 colexiados	6

Se nalgún colexio non existir algún dos cargos antes mencionados con dereito a asistencia á Xunta Xeral, aquel designará un colexiado que o substitúa.

2. A Xunta Xeral de Representantes é a suprema instancia consultiva e decisoria da organización colexial dos enxeñeiros agrónomos e os seus acordos ou orientacións estratéxicas terán carácter vinculante para a organización colexial, sendo a Xunta de Decanos o órgano responsable da súa aplicación.

3. Son funcións da Xunta Xeral de Representantes:

a) Determinar as liñas estratéxicas de actuación do Consello Xeral nos ámbitos colexial e profesional.

b) Adoptar acordos sobre asuntos de especial relevancia ou interese para a organización colexial, propostos pola Xunta de Decanos ou por un número de colexios que representen, ao menos, o 10% dos colexiados inscritos no Rexistro Central.

c) Aprobar as normas de deontoloxía profesional por proposta da Xunta de Decanos.

d) Aprobar o seu regulamento de réxime interior.

e) Aprobar, por maioría de dous terzos dos membros de dereito, a moción de censura que contra o presidente do Consello Xeral sexa proposta pola Xunta de Decanos.

f) Aprobar a creación de comisións de traballo e deliberar sobre as propostas formuladas por estas.

4. A Xunta Xeral de Representantes reunirse con carácter ordinario cada dous anos, sen prexuízo de que, excepcionalmente e de forma motivada, poida ser adiantada ou atrasada pola Xunta de Decanos. Así mesmo, poderá reunirse con carácter extraordinario, logo de convocatoria do presidente, por iniciativa propia ou a petición da Xunta de Decanos ou de tres colexios con, ao menos, o dez por cento da totalidade dos colexiados.

5. Os acordos da Xunta Xeral de Representantes, salvo nos casos en que se establezan expresamente outras maiorías, adoptaranse por maioría simple de votos afirmativos sobre negativos. Non se poderán adoptar acordos respecto a asuntos que non figuren na orde do día.

6. A Xunta Xeral de Representantes poderá acordar a creación de comisións de traballo, que estarán integradas por membros da citada xunta ou colexiados, designados polas xuntas de goberno dos colexios interesados en participar nelas. As propostas acordadas no seo das comisións serán presentadas para exame e debate á Xunta Xeral de Representantes.

7. O regulamento de réxime interior determinará o funcionamento da Xunta Xeral de Representantes.

Artigo 42. *Xunta de Decanos.*

1. A Xunta de Decanos é o órgano de goberno e administración do Consello Xeral e o titular das súas competencias, salvo as que expresamente estean atribuídas aos demais órganos polos presentes estatutos.

2. Compoñen a Xunta de Decanos o presidente e o secretario do Consello Xeral e os decanos dos colexios. Os decanos poderán outorgar a súa representación ao membro da respectiva xunta de goberno que expresamente designen para este efecto.

3. A Xunta de Decanos celebrará sesións ordinarias no primeiro, segundo e cuarto trimestre de cada ano. Así mesmo, poderá reunirse en sesión extraordinaria, logo de convocatoria do presidente, por iniciativa propia ou a petición de, ao menos, tres dos decanos membros.

4. As convocatorias, que incluírán a orde do día, cursaranse con ao menos dez días naturais de anticipación, salvo que concorran razóns de urxencia, e neste caso convocarase no prazo que se coide conveniente.

5. Para a válida constitución da Xunta de Decanos requírese a asistencia, en todo caso, do presidente ou de quen estatutariamente o substitúa e a da metade máis un do número legal de membros. Ás reunións da Xunta de Decanos poderá convocarse o secretario técnico do Consello Xeral, que, neste caso, asistirá con voz pero sen voto.

6. As votacións poderán ser ordinarias, nominais ou secretas. As votacións secretas e as nominais procederán se o solicitan ao menos tres dos membros asistentes, e

prevalecerá a votación secreta cando se pidan ambas simultaneamente. Nas votacións nominais farase constar en acta o voto emitido por cada membro e nas ordinarias o dos que así o soliciten; tanto nas votacións ordinarias como nas nominais poderá engadirse unha sucinta motivación do voto respectivo.

7. Terán dereito de voto todos os membros da Xunta de Decanos presentes ou debidamente representados. Os acordos adoptaranse por maioría simple de votos afirmativos sobre negativos e cada membro terá un voto. Os empates dirimiranse cunha nova votación na cal o presidente terá voto de calidade se se repetir o empate. Non se poderán adoptar acordos respecto a asuntos que non figuren na orde do día.

8. A Xunta de Decanos poderá designar comisións especializadas para asistila no máis eficaz exercicio das súas funcións e competencias.

Sección 2.^a Órganos auxiliares

Artigo 43. Comisión Permanente.

1. A Comisión Permanente está integrada polo presidente e o secretario do Consello Xeral e tres decanos de colexios elixidos pola Xunta de Decanos. Ás reunións da Comisión Permanente poderá convocarse o secretario técnico do Consello Xeral que, neste caso, asistirá con voz pero sen voto.

2. Corresponde á Comisión Permanente asistir a Xunta de Decanos no exercicio das súas funcións e exercer as competencias que a Xunta de Decanos lle delegue, así como entender daqueles asuntos de notoria urxencia dando conta do actuado a aquela na súa próxima reunión.

3. As convocatorias, que incluírán a orde do día, cursaranse con ao menos sete días naturais de antelación, salvo que concorran razóns de urxencia, caso en que se convocará no prazo que se coide conveniente. As reunións da Comisión Permanente serán convocadas polo presidente a petición propia ou a petición de dous dos decanos membros dela.

4. Os decanos poderán outorgar a súa representación ao membro da respectiva xunta de goberno que expresamente designen para este efecto.

5. Os acordos adoptaranse por maioría simple de votos afirmativos sobre negativos e cada membro terá un voto. En caso de empate, o presidente terá voto de calidade. Non se poderán adoptar acordos respecto a asuntos que non figuren na orde do día.

Artigo 44. Secretario do Consello Xeral.

1. É competencia do secretario do Consello Xeral:

a) Levantar acta das sesións da Xunta Xeral de Representantes, da Xunta de Decanos e da Comisión Permanente.

b) Cursar as convocatorias e notificacións.

c) Custodiar os arquivos do Consello e expedir as certificacións oportunas.

d) Executar os acordos do Consello Xeral.

e) Exercer a dirección dos servizos administrativos e a xefatura de persoal.

2. O secretario do Consello Xeral será designado por votación da Xunta de Decanos de entre colexiados cun mínimo de tres anos de colexiación. O seu mandato terá unha duración de catro anos. O secretario do Consello Xeral pode ser reelixido.

3. Nos casos de ausencia, enfermidade ou vacante do secretario do Consello Xeral, suplirao provisoriamente no exercicio das súas funcións o membro da Xunta de Decanos que esta designe.

4. Coa finalidade de auxiliar o secretario do Consello Xeral poderá nomearse como cargo profesional non electivo un secretario técnico, cuxa forma de provisión se determinará no regulamento de réxime interno do Consello.

CAPÍTULO II

Funciós

Artigo 45. *Funciós do Consello Xeral.*

Para a consecución dos fins esenciais sinalados no artigo 5 destes estatutos, o Consello Xeral exercerá as seguintes funciós:

1. De ordenación:

a) Elaborar e aprobar, logo de audiencia dos colexios, conforme o procedemento establecido no regulamento de réxime interior, as modificacións ou reforma dos presentes estatutos xerais, para a súa posterior elevación ao Goberno da Nación.

b) Aprobar os estatutos particulares de cada colexio conforme o artigo 6.4 da Lei 2/1974, do 13 de febreiro.

c) Informar nos procedementos de constitución, fusión, absorción ou segregación dos colexios.

d) Elaborar e aprobar as normas deontolóxicas e outras disposicións comúns para a adecuada ordenación ou control da actividade profesional que, como autoridade competente, conforme o artigo 2.5 da Lei 2/1974, do 13 de febreiro, lle correspondan, logo de audiencia dos colexios, para asegurar o debido cumprimento dos fins esenciais do Consello Xeral descritos no artigo 5.3 destes estatutos.

e) Realizar actuacións xerais de coordinación en materias de interese común de acordo coa normativa de defensa da competencia.

f) Resolver os recursos contra actos colexiais nos supostos previstos no artigo 38 destes estatutos.

g) Exercer a potestade disciplinaria nos supostos determinados no artigo 34 destes estatutos.

h) Garantir, no exercicio das súas competencias, a igualdade de trato dos enxeñeiros agrónomos e a súa liberdade de exercicio en toda España.

i) Coordinar e supervisar os colexios profesionais para o cumprimento das medidas establecidas na Lei 17/2009, do 23 de novembro, sobre o libre acceso ás actividades de servizos e o seu exercicio.

j) Velar para que os colexios profesionais cumpran inmediatamente a petición de asistencia recíproca dos Estados membros.

2. De representación:

a) Representar unitariamente a organización colexial ante os poderes públicos de ámbito estatal, en defensa dos intereses profesionais e prestando a súa colaboración nas materias da súa competencia.

b) Representar a organización colexial ante outras profesións e entidades con ámbito estatal.

c) Representar a profesión e a organización colexial nas organizacións e congresos internacionais.

d) Emitir informe sobre os proxectos de lei ou de disposicións de calquera rango que se refiran ás condicións xerais das funcións profesionais, entre as cales figurarán o ámbito, os títulos oficiais requiridos, o réxime de incompatibilidades con outras profesións e o de honorarios cando se rexan por tarifas ou aranceis.

e) Exercer as funcións colexiais en canto teñan ámbito ou repercusión nacional ou internacional.

3. De coordinación:

a) Levar o Rexistro Central de Colexiados, nas condicións establecidas no artigo 19 dos presentes estatutos, e o Rexistro Central de Sociedades Profesionais.

- b) Arbitrar nos conflitos que se susciten entre colexios pertencentes a distintas comunidades autónomas.
- c) Informar e asesorar os colexios en cantas materias de carácter profesional ou colexial sometan a el.
- d) Elaborar estatísticas e estudos sobre a profesión con base nos datos proporcionados polos colexios.
- e) Promover entidades e servizos de interese xeral para os enxeñeiros agrónomos, respectando o disposto na Lei 15/2007, do 3 de xullo, de defensa da competencia.
- f) Asegurar a debida comunicación e cooperación entre os colexios para o mellor exercicio das súas funcións.

4. De organización:

- a) Elaborar e aprobar o seu propio regulamento de réxime interior.
- b) Aprobar os seus propios orzamentos e determinar as contribucións dos seus membros conforme o disposto nestes estatutos.
- c) Administrar o seu patrimonio e dispor sobre os seus dereitos e bens.
- d) Elaborar, aprobar e publicar a memoria anual do Consello Xeral a que se refire o artigo 11 da Lei 2/1974, do 13 de febreiro. A memoria anual deberá facerse pública a través da páxina web no primeiro semestre de cada ano.
- e) Dar publicidade, de forma agregada para o conxunto da organización colexial, á información estatística que se extrae das memorias anuais dos colexios territoriais.
- f) Dispor dun portelo único segundo o previsto no artigo 10 da Lei 2/1974, do 13 de febreiro, e na Lei 19/2013, do 9 de decembro, de transparencia, acceso á información pública e bo goberno. O Consello Xeral deberá adoptar as medidas necesarias para o cumprimento do previsto neste artigo e incorporar para isto as tecnoloxías precisas que garantan a interoperabilidade entre os distintos sistemas e a accesibilidade das persoas con discapacidade.

5. En xeral, todas aquelas outras que revistan interese común e xeral para a profesión, sen prexuízo das competencias propias de cada colexio.

CAPÍTULO III

Réxime do Consello Xeral

Sección 1.^a Réxime xurídico

Artigo 46. *Sistema normativo.*

O Consello Xeral dos colexios oficiais de enxeñeiros agrónomos réxese polas seguintes normas:

- a) A lexislación estatal en materia de colexios profesionais.
- b) Os presentes estatutos xerais.
- c) O regulamento de réxime interior que se aprobe en desenvolvemento e aplicación do título III dos presentes estatutos xerais.
- d) O resto do ordenamento xurídico en canto lle resulte aplicable.

Artigo 47. *Eficacia dos actos.*

1. Os acordos adoptados polo Consello Xeral en exercicio de potestades administrativas consideraranse executivos desde a súa adopción, sen máis requisito que a súa notificación ou publicación en forma cando proceda e salvo que dos seus propios termos resulten sometidos a prazo ou condición de eficacia. Desta regra soamente se exceptúan as resolucións en materia disciplinaria, que se axustarán ao disposto no artigo 31 destes estatutos.

2. Os acordos adoptados polos órganos do Consello Xeral en materia da súa competencia vinculan todos os colexios, sen prexuízo dos recursos que poidan interpor contra eles conforme as leis. Nos casos de incumprimento reiterado, a Xunta de Decanos, logo de requirimento conminatorio ao órgano de goberno correspondente, poderá acordar a incoación de expediente disciplinario aos membros do órgano responsable de dar cumprimento ás resolucións do Consello Xeral, como presuntos autores dunha infracción grave tipificada no artigo 28.3.i) destes estatutos.

Artigo 48. *Réxime de recursos.*

1. O Consello Xeral será competente para coñecer dos seguintes recursos:

- a) Recurso potestativo de reposición contra as resolucións, disposicións ou acordos adoptados polo propio Consello Xeral en única instancia.
- b) Recurso dealzada contra as resolucións, disposicións ou acordos adoptados por órganos colexiais no suposto indicado no artigo 38 dos estatutos.

2. Os recursos contidos neste artigo interporanse no prazo dun mes desde a publicación ou notificación dos acordos e de tres meses desde o día seguinte a aquel en que se produzan os efectos do silencio administrativo. O recurso de alzada deberá ser resolto no termo de tres meses e o de reposición nun mes desde a súa interposición. Transcorrido este termo sen se ditar e notificar ou publicar resolución, os interesados poderán entender desestimados os seus recursos, salvo naqueles supostos en que, conforme a lexislación xeral sobre procedemento administrativo, proceda entender a súa estimación presunta.

3. Os acordos do Consello Xeral poñen fin á vía corporativa e son directamente impugnables ante a xurisdición contencioso-administrativa de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Artigo 49. *Réxime disciplinario.*

1. Corresponde ao Consello Xeral de Colexios Oficiais de Enxeñeiros Agrónomos o exercicio da potestade disciplinaria por infraccións cometidas polos seus propios membros e polos órganos de goberno dos colexios cando esta competencia non estea atribuída pola lexislación autonómica a outra instancia colexial.

A resolución dos expedientes disciplinarios que son competencia do Consello Xeral, de acordo co establecido no artigo 28 dos estatutos, corresponde á Xunta de Decanos.

2. O regulamento de réxime interior do Consello Xeral regulará o procedemento disciplinario conforme o establecido no capítulo IV do título II destes estatutos.

3. O Consello Xeral poderá prever a constitución dunha comisión de réxime disciplinario como órgano dotado de autonomía funcional, coa misión de asumir a instrución dos expedientes e formular as oportunas propostas de resolución á Xunta de Decanos.

Sección 2.ª Réxime económico

Artigo 50. *Recursos económicos.*

1. Son recursos económicos do Consello Xeral:

- a) As contribucións dos colexios que o integran.
- b) Os ingresos por publicacións ou outros servizos remunerados que teña establecidos.
- c) Os dereitos ou honorarios pola emisión de certificacións, ditames, informes ou outros asesoramentos que se lle requiran.
- d) Os rendementos do seu patrimonio.
- e) As subvencións ou donativos que reciba.
- f) Cantos outros lle poidan corresponder legalmente.

2. As contribucións económicas dos colexios fixaranse nos orzamentos anuais do Consello en función do número de colexios e do número de colexiados de cada colexio, tomando como base os colexiados que figuren inscritos no rexistro central, dispoñible pola Xunta de Decanos na súa reunión ordinaria do segundo trimestre do ano.

As porcentaxes do orzamento do Consello que corresponde atribuír a cada unha das citadas variables serán establecidas pola Xunta Xeral de Representantes, porcentaxes que poderán ser modificadas por acordo desa Xunta, adoptado por unha maioría de dous terzos dos votos, sen prexuízo do establecido na disposición transitoria terceira.

3. Os respectivos colexios están obrigados a recoller nos seus orzamentos anuais as contribucións económicas acordadas polo Consello Xeral. As contribucións aboaranse por sextas partes dentro de cada bimestre, e serán a cargo de cada colexio os gastos e xuros que orixine a demora no pagamento.

4. O incumprimento do deber de contribución económica ao Consello Xeral durante un período superior a un ano dará lugar á incoación de expediente disciplinario aos membros do órgano colexial responsable do incumprimento como presuntos autores da infracción grave tipificada no artigo 29. 3.a), sen prexuízo de que o Consello Xeral interpoña os recursos procedentes.

Artigo 51. *Réxime orzamentario.*

1. O Consello Xeral actuará en réxime de orzamento anual, único e nivelado, de acordo co establecido nestes estatutos. O exercicio económico coincidirá co ano natural.

2. Os superávits e déficit orzamentarios, unha vez aprobados, asignaranse ou financiaranse, respectivamente, segundo acorde a Xunta de Decanos.

Artigo 52. *Patrimonio do Consello Xeral.*

O patrimonio do Consello Xeral estará composto por todos os bens mobles e inmobles que adquiera, en virtude de calquera título xurídico, e polo saldo da súa tesouraría.

Disposición adicional primeira. *Aplicación da lexislación autonómica.*

O disposto nos estatutos xerais dos colexios oficiais de enxeñeiros agrónomos e do seu Consello Xeral enténdese sen prexuízo das competencias que, en materia de colexios profesionais, corresponden ás comunidades autónomas conforme a súa lexislación propia e, na súa virtude, do réxime xurídico dos colexios oficiais de enxeñeiros agrónomos que resulte daquelas e que se encontran constituídos conforme a normativa aplicable.

Disposición adicional segunda. *Modificacións do ámbito territorial dos colexios.*

O réxime de segregación, fusión ou calquera outra operación de alteración do ámbito territorial dun colexio será o establecido nos estatutos particulares de cada colexio. Non obstante, toda proposta de alteración do ámbito territorial requirirá do acordo da xunta xeral do colexio ou colexios afectados, logo de informe do Consello Xeral, e será comunicada ao órgano da Administración que deba aplicala, de conformidade co disposto na correspondente lexislación sobre colexios profesionais.

Disposición adicional terceira. *Ámbitos territoriais dos actuais colexios oficiais supraautonómicos.*

Os colexios oficiais de ámbito supraautonómico existentes na data de entrada en vigor deste real decreto manterán os seus actuais ámbitos territoriais, sen prexuízo das modificacións futuras que poidan realizarse conforme o establecido nos presentes estatutos e da regulación que resulte en caso de que as comunidades autónomas, en virtude das competencias que teñen atribuídas en materia de colexios profesionais, constitúan colexios ou consellos autonómicos nos seus respectivos territorios.

Disposición adicional cuarta. *Normas deontolóxicas.*

As normas deontolóxicas da profesión, que deberán adaptarse ao disposto nos presentes estatutos, serán de público coñecemento e accesibles por vía electrónica a través da páxina web do colexio ou do Consello Xeral, se for o caso.

Disposición adicional quinta. *Termos xenéricos.*

As mencións xenéricas en masculino que aparecen no articulado dos presentes estatutos enténdense referidas tamén ao seu correspondente feminino.

Disposición transitoria primeira. *Mandatos de cargos de goberno do Consello Xeral.*

Os membros dos actuais órganos de goberno do Consello Xeral permanecerán nos seus cargos até a expiración do seu mandato, que será cando se convoquen eleccións de conformidade co disposto nos presentes estatutos xerais.

Disposición transitoria segunda. *Vixencia da obrigatoriedade de colexiación.*

De conformidade co establecido na disposición transitoria cuarta da Lei 25/2009, do 22 de decembro, até a entrada en vigor da lei nela referida (que determinará as profesións para cuxo exercicio será obrigatoria a colexiación), manterase a obrigatoriedade de colexiación vixente e que se contén no artigo 14 dos presentes estatutos xerais, sempre que así se preveña na mencionada lei estatal e nos termos nela establecidos.

Disposición transitoria terceira. *Orzamentos do Consello Xeral.*

Até que a Xunta Xeral de Representantes aprobe as porcentaxes do orzamento do Consello Xeral que corresponde atribuír a cada unha das variables referidas no artigo 51.2 dos presentes estatutos, a contribución económica dos colexios ao citado orzamento fixarase conforme o seguinte criterio: un 25 por 100 do orzamento distribuirase en función do número de colexios e o 75 por 100 restante en función do número de colexiados de cada colexio.